

永樂大典纂修人考補

朱鴻林

郭伯恭先生撰「永樂大典考」一書，其第三章曰「纂修諸人考略」，考當時與事者爵里行事之略也。總錄一百九十三人，除「明實錄」中所載總裁副總裁等二十八人外，凡新考見者一百六十五人【註一】。後王重民先生撰「永樂大典纂修人考」一文，總錄二百四十五人。凡得郭氏所未見者五十六人，而郭氏原考得者四人，尚未錄焉【註二】。合二文所得，預「大典」之役而可考見者，凡二百四十九人。郭文筆路之作，所引明中葉前人文集二十種，方志二十一種，史傳人物志六種，書目及他專著又五種，凡引書五十二種。王文後出轉精，蓋「閱明本地方志幾四百種」而得奠基焉【註三】。計引明人文集二十七種，方志四十八種，史傳人物志九種，書目及他專著十五種，總引書且幾百部。雖所覽各有廣狹，所考各有詳略，要之用力專心，俱可佩也。頃余閱永樂至景泰間人文集，又於「大典」副總裁王褒「養靜文集」【註四】得郭王二文所未錄纂修謄錄人可確定者二十二人，可存疑者九人。此書蓋二先生所未及見用者。諸人僅見序記，有行事未甚可詳者，因就有關方志考之，又旁得與斯役者十人焉。凡新見者，竟餘四十之數。爰依二氏之例，各為撮引爵里行略，用昭往世之幽光，稍補前賢之未備。若夫魏驥「南齋先生魏文靖公摘稿」，何文淵「東園遺稿」，蕭鎡「尚約居士集」【註五】諸書文字可補充郭王二文者，亦並錄附篇末焉。

纂修

方昌：

王褒「鰲江書舍記」：「福清縣南行一舍許，長江通羣山間，其江曰鰲江。……面江以居，儒者方用良父家也。父當國

初用經術薦。終始三十年，五遷倉庫驛官，以惠之歸善縣簿而卒。……其家有樓，曰讀書軒、曰觀我堂、曰義方。又因其地而扁曰鰲江書舍。其嗣子昌以太學上舍入中秘書修『大典』，徵予記。……昌字友文。昆仲五人，以孝友聞。」（「養靜文集」卷一頁四九下）

「乾隆福州府志·選擇」：「（福清縣學歲貢生）方昌」。（卷四一頁五〇上）

按：據志福清縣學洪武至宣德間貢生凡四十六人。方昌列第二十二，蓋永樂間所貢，當即王氏序所贈者同人。

王孟：

「乾隆福州府志·列傳」：「王孟字文浩，福清人。洪武中以明經薦。授如皋教諭，改鹽城，擢國子博士。永樂初，擢薦大理評事。文皇嘉其明允，御書葵軒二字賜之。出知沔陽州，有惠政。召修『大典』，卒于京。孟性勁直，居官所至，以清著名。」（卷五七頁一六上）

王褒「桃林燕集序」：「皇明重熙累洽，誕敷文治，迺采石渠虎觀故實，集天下鴻生碩士，裒彙古今墳籍，以成聖世大典。永樂八年六月初吉『大典』告成，獲賜休沐，牽擇佳勝，以爲文字之會。湖口文學陳廷傑氏首得桃林之陰，壺觴弓矢，棊琴圖籍，以供娛樂。曰既西，僉沾醉。紀善鄭先生謂客十有二，取唐王摩詰六言詩二句，齒而分之。詩成命褒序，弁其首。予惟古昔文儒會合，播諸篇什者多矣。……矧茲館閣之選，當校讎之暇，合文武之良，假林泉之集。……座之客：沔陽太守王文浩，翰林檢討蘇伯厚，待詔高廷禮，左春坊左贊善兼翰林修編陳仲完，翰林編修陳果之，校官方中山、姜子萬、林伯子、林文節，衛千戶陳彥清，鄭先生孟宣，泊褒十二人。詩序列于后，並得松字。」（「養靜文集」卷四頁四六上）

按：王褒序中所及陳（賢）廷傑，蘇（梓）伯厚，陳（完）仲完（三人俱以字行），陳（全）果之，俱預「大典」之役而爲郭王二文所已錄者。林（謹）文節亦在纂修之列，詳見下文。今據府志又得王孟之嘗預纂修事，與褒序所言合。細味序文，似其餘諸人亦並當日與役之同列也。又上名諸人及高（棟）廷禮、林（賜）伯子、鄭（定）孟宣與褒俱係閩籍，則方中山、姜子萬、陳彥清三氏，雖本名不知，難對方志，殆亦閩人無疑。

王驥：

王褒「贈王教諭序」：「聖朝……彙集古今墳籍爲『永樂大典』，以垂萬世楷範。書成，登館閣，列侍從，出爲牧伯守令者，項背相望，蓋極簡拔之選，萃奇偉之才。……有若王驥性善，其一也。性善以國子舍預纂修列有年矣，繼而領京畿薦，擢閩之福清教諭。與閩郡貢士林生文楷游，馬首將東，生謁予言以餞之。……性善餘杭人。」（「養靜文集」卷三頁六上）

「嘉慶餘杭縣志·選舉」：「（永樂九年舉人）王驥——官福清訓導」。（卷二三頁一二上）

按：「乾隆福州府志·職官」福清縣教諭、訓導無王驥名。教諭永樂間任者，但有王完。（卷三三頁六六下）

丘重：

「乾隆泉州府志·文苑」：「丘（邱）重字德厚，晉江人。以文學被推，授禮部主事。從楊文敏榮纂修『永樂大典』，時稱良史才。仕終南刑部郎中。」（卷五四頁三三上）

林桐：

「民國閩侯縣志·循吏」：「林桐字正行，（侯官人）。……洪武中舉明經。擢第一，授順昌訓導。改貴溪典史，鋤強暴，抑兼併，盜賊屏息。永樂中移天臺，薦修『大典』。書成，擢兵科給事中。會臺州民合疏乞還治郡，帝疑爲黨，除籍，罰充吏。尋起吉安推官，緝捕劇惡，人稱神明。暇則與士人講授經義，討論正學，士民戴之。宣德初召補文選司郎中。」（卷八頁一上）

林謹：

王褒「送開化林教諭序——林謹字文節」：「……文節與予居同邑，學同業，志同道，少相好也。逮文節以毛鄭『詩』魁鄉薦，道籍于朝，予意取青紫如俯拾地芥，以曷數奇弗偶，崎嶇南北者又一紀……」。（「養靜文集」卷四頁一〇下）

王褒「儲潭歸思詩序」：「快閣以上曰十八灘，……灘之上曰儲潭。……永樂四年夏，詔徵天下碩儒畢集東觀，彙聚古今墳籍，以成治世大典。予友贛郡司訓林文節氏首應明詔而起，郡祭酒武昌鮑禮夫氏觴于儲潭之上（以別）。」（同上卷四）

頁四四下)

王褒「送林文節歸贛序」：「……洪武丁卯文節氏以『詩』首薦，東書西上。後五年，予方計偕。又十年，予爲永豐令，文節氏以贛郡訓迪，俱朝京師，胥會于旅邸。……其年予應詔入史館，文節氏雨雪中別去，弗能周旋。又四年，……會爲『永樂大典』，文節氏以廣左校文首應茲命，館于予，將二載。……書成，賜賚南歸。閩之官于朝者，咸詩歌以詠其行，俾予序……。」（同上卷四頁五下）

按：林謹閩志無傳。據王褒諸文，則福州人也。「乾隆福州府志·選舉」洪武二十年丁卯科舉人表有林謹，出府學，唯表端注是科榜首無考（卷四〇頁四上）。準王氏諸序，是科榜首正謹也。

周維新：

王褒「送無爲周別駕序」：「聖朝崇文治，……制『永樂大典』，予忝史官，叨備總裁。廬陵（鄭）鄒以信氏以婺源令，諸暨周維新氏以太學生，俱在纂修之列。書成，以信以近臣薦，遷爲無爲州守，且三載矣。維新歷事夏官，有能聲，擢無爲州別駕。……以信之爲守，予詩以道之。延平李有文之爲（無爲）倅，予文以祝之。茲維新復別駕茲州，第徵予文以行……。」（「養靜文集」卷三頁七上）

按：周維新「康熙諸暨縣志」「光緒廬州府志」俱無考。鄒以信鄒字誤刻鄭字，說見鄒氏條下。

胡昂：

王褒「盡思堂記」：「距建昌郡治一舍許曰南山，其前爲澗湖，……胡氏世居其間。其孝子曰子固氏，葬其先君子雲莊父于山之麓，取古人盡思之義扁其堂，示不忘于心也。其從弟連江令子昂氏入秘閣修『大典』，謁予爲記……。」（「養靜文集」卷一頁一四上）

「民國連江縣志·職官」：「（永樂朝知縣）胡昂——江西人」。（卷一二頁三八下）

按：「康熙建昌縣志」無胡氏事蹟。「連江縣志」永樂朝知縣八人，胡氏列第二，以時度之，當卽王褒爲撰記者，然則子昂似爲別字。

倪峻：

王褒「送華陰教諭劉從善序」：「皇明弘文治，崇儒術，……彙集古今羣書，以成盛世大典。兵科左給事中倪君克明被命入館，與我居同席，行聯裾，為親而密也。恆為予言昔教中州日，有高材生劉從善氏。……倪君以儒者為延平之沙縣，英聲茂實，遠近籍籍。逮今去縣者三年，其民念之愛之，誠若子之於父母。繼列朝著，問學詳雅，儀矩端嚴，武夫悍卒，猶知起敬……。」（「養靜文集」卷三頁五一上）

「光緒無錫金匱縣志·忠節」：「倪峻字克明。洪武二十三年舉人，授鄞城教諭，歷泗水、沙縣知縣，擢兵科給事中。時文皇帝好佛，峻上疏極諫，忤旨，遣使占城，後先浮海垂二十年。初，占城國王欲召見峻，峻力折之，俾郊迎而後宣詔。終都給事中。」（卷二三頁一二下）

「道光福建通志·宦績」：「（明沙縣知縣）倪峻字維岳，無錫舉人——『江南志』作丹徒人，洪武間任。先是郡五邑稅糧悉從海道轉輸鎮東衛，山民不諳舟楫，多致覆溺，責令重賠。峻奏請改輸福州延平二衛，民甚便之。」（卷一三四頁一四下）

按：倪峻二字於義俱協，當是一人無疑。或入朝而始更克明為字歟。

秦顯：

王褒「詠歸亭詩序」：「予友秦顯思文居閩城之西，屋後有園數畝，構亭其間，……曰詠歸。思文領鄉薦，入太學，預纂修『永樂大典』之列。獲請東歸，過予別曰：……（請序之旨）。」（「養靜文集」卷四頁二三上）

「乾隆福州府志·選舉」：「（永樂六年戊子科舉人）秦顯——九江推官。」（卷四〇頁一〇上）

按：據志顯出懷安府學。

袁時億：

「光緒杭州府志·儒林」：「袁時億字益善，新城人。五六歲能誦『孝經』『論語』。洪武初以明經薦，授吳江教諭。孜孜講說聖賢道德仁義，以開諭後學為己任，屢典文衡，號稱得人。預修『永樂大典』。卒於京師。」（卷一三八頁八下）

陳山：

「福建列傳·明一」：「陳山字汝靜，一字伯高，沙縣人。洪武癸酉舉人。授始興教諭，移奉化。永樂六年召修『永樂大典』。擢吏科給事中，……十一年偕張瑛侍皇太孫講讀，……宣德初，升行在戶部左侍郎。高煦叛，……言趙漢二王實同心，宜移兵彰德擒趙王。……二年二月拜戶部尚書，兼謹身殿大學士，直文淵閣，領機務，充兩朝實錄總裁。……四年十月命輟機務，事授小內使書。久之，以老請致仕。……卒年七十。」（卷一七頁一二下）

陳任：

「光緒杭州府志·仕績」：「陳任字孝原，錢塘人。永樂初以江南徐州訓導召入文淵閣，預修『永樂大典』。書成，授福建古田教諭。秩滿，諸生疏留。在任十餘年，勤於訓迪，得人爲盛。卒於官。」（卷一三三頁五上）

按：傳亦見「乾隆福州府志·名宦」（卷四八頁四七下），同引「古田縣志」。

陳福山：

王褒「歸師亭記」：「泉屬邑曰同安，……其邑陳君福山，始隸諸生，入成均，登進士第，擢零陵令。以上計愆期，解龜南歸有年矣。邑令浦江倪侯服其賢，薦而師于邑。陳君載葺斯亭，……日與生徒游息其中，討論子朱子之學。教諭番禺李君綱扁其亭曰歸師。永樂四年夏，陳君應詔校書東觀，數謁予記之……。」（「靜養文集」卷一頁三上）

「乾隆泉州府志·仕績」：「陳福山，同安人。洪武癸酉甲戌聯第進士。令零陵，奏蠲無徵稅千餘石。永樂丙戌較文廣東。丁亥徵入纂修『大典』。後改江山縣訓導。陞瀧水教諭。」（卷五二頁一二下）

黃桓：

王褒「山中草堂記」：「繇峽江入南半舍許，曰瀨江。瀨江有山曰紫臺，……山之中黃氏族居焉。黃氏最良曰桓宗武者，構草堂于屋東偏宇，曰山中草堂。宗武用經術游成均，入中秘偕予纂修『大典』，數爲予言山中景……。」（「養靜文集」卷一頁五〇下）

按：瀨江在吉安，流入莆田，然「順治吉安府志」「乾隆莆田縣志」於黃氏俱無考。

曹景暉：

王褒「送曹通判元官姑蘇序」：「杭之海寧曹景暉氏，性靜而德懋，學敏而識銳，文章振發，如泉達火燃，疊疊不休。登永樂二年進士第，入翰林爲庶吉士，纂修『永樂大典』。才譽煒然，著聞遐邇。十二年夏六月擢蘇郡倅，職專農也。……其兄彥昌氏同登進士第，爲同年，同入翰林，爲同官。顧予叨考其年南宮試，忝座主也，徵言以贈其（弟）行……。」（「養靜文集」卷三頁二一下）

「嘉靖海寧縣志·選舉」：「（進士）沈升——永樂二年曾榮榜，仕至太僕寺少卿。孫子良——曾榮榜，仕至兵部郎中。俞禮——曾榮榜，仕翰林院庶吉士。曹景暉——曾榮榜，仕至蘇州通判。曹彥昌——曾榮榜，仕至漢府教授。以上五人，俱選翰林院庶吉士。時稱五鳳齊飛入翰林。」（卷七頁二下）

按：沈升，孫子良預「大典」纂修列，郭、王二文已錄之。今據王褒此文，得曹景暉亦曾預其事。味文意，則其兄彥昌又嘗共事。五人俱庶吉士，而四人嘗預纂修事，似俞禮亦應以同官共役也。

褚讓：

王褒「送褚讓侍親序」：「（褚讓）克恭杭人，登永樂二年第。以庶吉士入翰林，同纂修『永樂大典』者五年矣。七年春以父母俱白首家居，上疏乞歸養。朝廷以孝治天下，特允其請……。」（「養靜文集」卷二頁四六上）

「光緒杭州府志·仕績」：「褚讓字克卿，仁和人。永樂二年進士。授禮部祠祭司主事，歷吏部文選司郎中。清介特立，土苴貨賄。遇人餽遺，輒厲聲曰：若謂天下僅關西孔子耶。凡諸權貴造請，一概峻絕。出爲山西參政，有循聲。未幾乞聞，卒於家。」（卷一三三頁五下）

按：讓字克恭，於義爲長。

彭守學：

「嘉慶深陽縣志·選舉」：「（建文己卯科舉人）彭守學——永樂間徵修『大典』。授雅州學正，因建言逮獄，十年始釋。陞嘉定知州。」（卷一〇頁九上）

鄒以信：

據王褒「送無爲周別駕序」，鄒以信以婺源令預纂修事。見周維新條下。

「康熙婺源縣志·官師」：「（明知縣）鄒以信吉安府廬陵人。初任崇德教諭，陞知縣。慈祥愷悌，臨政有方。秩滿陞無爲知州。後家於甲路。」（卷六頁五上）

「光緒廬州府志·名宦」：「鄒以信廬陵人。永樂五年知無爲州。政尚德教，州人感化。謂其博學能文，稱爲文章太守。」（卷二八頁一〇下）

按：鄒以信王褒序文誤刻作鄒以信，觀兩志表傳及王褒「養靜詩集」（卷三頁八上）有「送無爲知州鄒以信」五律詩可知也。又吉安、廬陵諸志於鄒氏俱無考。

劉叔恣：

「康熙廬陵縣志·列傳」：「劉叔恣。初爲沅陵知縣，以愛民爲務，勤撫綏。縣介溪洞，先是民困徭役，竄山谷中，叔恣悉招徠復業。有爭訟者，不治以法，爲開諭再三，必服而後遣之。遷員外郎，廉勤舉職。召修『永樂大典』。沅陵民數陳乞請叔恣還官，詔陞辰州同知，七邑之民，如得父母。會營宮殿，率郡民就役，卒都下。民在役者悲慕，具殮祭甚哀。役滿，載其喪歸葬辰州。」（卷二〇頁五一下）

潘華：

（成化處州府志·麗水仕宦）：「潘華字廷哲。由舉人永樂四年選入文淵閣預修『大典』。七年中乙榜，授直隸臨淮縣學爲教諭。十年奉恩勅入禮經館纂修。書成，復歷長汀、南昌、鎮江、上饒諸學。」（卷三頁六〇上）

蔣應衍：

王褒「服訓齋序」：「……浦城蔣應衍氏家世儒舊也。其先人均厚翁嘗作『精業訓』以訓之，應衍受而藏之，……復扁其所居之齋曰服訓。永樂四年朝廷廣召天下儒彥纂修『永樂大典』，應衍被召。居京師，縉紳大夫士多爲文若詩以稱揚之，且徵予序……。」（「養靜文集」卷四頁一六上）

按：蔣氏「光緒浦城縣志」無考。王褒「送翰林庶吉士鍾子旦歸省序」：「永樂二年春予官翰林，同考禮部試，而盱江鍾旭子旦氏登上第。繼入翰林爲庶吉士，預纂修『永樂大典』之職。予忝總裁，且同館，始終六年，相知爲深。子旦之嚴君則韶父以溫之平陽令丁王母夫人憂，在苦，而母夫人俱在衰經中。……書成，則上疏乞歸省……。」（「養靜文集」卷二頁三一上）

鍾旭：……

王褒「送翰林庶吉士鍾子旦歸省序」：「永樂二年春予官翰林，同考禮部試，而盱江鍾旭子旦氏登上第。繼入翰林爲庶吉士，預纂修『永樂大典』之職。予忝總裁，且同館，始終六年，相知爲深。子旦之嚴君則韶父以溫之平陽令丁王母夫人憂，在苦，而母夫人俱在衰經中。……書成，則上疏乞歸省……。」（「養靜文集」卷二頁三一上）

鍾旭：「康熙南城縣志·選舉」：「（永樂元年癸未科會榮榜）鍾旭——則韶子。御史，陞知府。」（卷二〇頁一一五下）

按：據志旭出南城縣學。唯志作永樂元年癸未進士，誤。當作二年甲申。同書同卷頁八九下舉人表書旭中永樂乙酉科舉人，亦誤。乙酉爲永樂三年，當作元年癸未。

費：……

膳錄

吳璣：……

「嘉慶溧陽縣志·孝行」：「吳璣字士衡。邑諸生，以善書有名。永樂七年選入太學，與修『大典』。授平度判官。陞知縣。璣事母至孝。母疾，忽思鷺炙，未至而終，遂終身不復食鷺云。」（卷一二頁一五上）

林柳：……

王褒「送四彥歸閩詩序」：「吾閩鄭榮居仁、陳循克順、林柳邦楚、陳福履中，閩之彥也。居仁、履中鄉士也。克順、邦楚郡邑生也。會『永樂大典』成，應明詔偕入東觀書之。訖功，錫賚南歸。閩之居館閣者，咸詩歌美其行。予懼其局於藝而弗進於德，故援其所聞以勗之……。」（「養靜文集」卷二頁四九下）

按：林柳「乾隆福州府志」無考。然褒序後繫詩第三首有「林子邑庠彥」句，是其當爲閩縣人也。陳循：……

王褒「送陳循序」：「……永樂四年夏國家纂修『永樂大典』。其書以萬計，迺詔天下凡工書者，咸得入東觀繕寫之。閩郡僉以諸生陳循克順應明詔。居歲餘，書成，錫賚南歸。以予同邑之好，且嘗忝總裁之列，徵言以爲規。陳生器宇凝靜，性資穎悟，敏於學而不倦，眞書其一也……。」（「養靜文集」卷四頁七下）

「乾隆福州府志·選舉」：「（永樂十二年甲午科舉人）陳循」。（卷四〇頁一二下）

按：據志陳循出福州府學。循預「大典」謄錄事，又見林桺條下。

陳福：

據王褒「送四彥歸閩詩序」，陳福字履中，以鄉士預役。見林桺條下。

「乾隆福州府志·選舉」：「（侯官縣學歲貢生）陳福——知縣」。（卷四一頁一三下）

按：據志侯官學洪武至成化間貢生凡六十六人，陳福列第二十四，疑卽王氏序所贈者。若然，則福侯官人也。

董宏：

「康熙建昌縣志·選舉」：「（明薦辟）董宏——以楷書舉繕寫『永樂大典』。授山東濮州同知」。（卷五頁一二上）

費斌：

王褒「具慶堂記」：「……太學生費斌氏，錢塘人。以甲戶入居輦轂之下。父母俱垂白無恙，兄弟三人如手如足，……而孝友之政行于一家。鄉邦閭里，歆艷夸耀，因以具慶扁其奉親之堂。斌入秘閣繕修『大典』，走謁予記之……。」（「養靜文集」卷一頁一六下）

按：費斌「萬曆錢塘縣志」「萬曆應天府志」俱無考。

鄭榮：

據王褒「送四彥歸閩詩序」，鄭榮字居仁，以鄉士預役。見林桺條下。

「乾隆福州府志·選舉」：「（福清縣學歲貢生）鄭榮——教諭」。（卷四一頁五〇上）

按：據志福清學洪武至宣德間貢生凡四十六人，鄭榮列第九，當在永樂間。似卽王氏序贈者同人。然則榮福清人也。

謝坤：

王褒「送謝坤歸閩序」：「聖朝致治雍熙，稽古考文，彙集百氏墳籍，粹爲無前之書，毋慮三萬卷。書成，賜名曰『永樂大典』。其書汗牛充棟，非歲月之工可筆而就，迺詔天下官庶子姓，庠序生徒，凡工楷法者，咸得應選。閩諸生謝坤順叔翹然而來，居東觀月（？）一朞。既竣事，錫賚以歸。以予忝總裁之職，徵言以榮其行。……生以弱冠之年，明敏之資，學日殖，行日砥，尙懋夫誠意正心之道，則吾閩當復見夫蔡襄氏之筆，而功業亦當與之準也……。」（「養靜文集」卷四頁五上）

「乾隆延平府志·選舉」：「延平府學貢生」謝坤——嚴州府訓導」。（卷二一頁一上）
按：據志謝坤名在明貢生表上第二。若表依貢年列次，則似過前，未必王氏所贈序者。然「道光福建通志」明選舉諸表中，亦唯延平府貢生中有謝坤之名。又上引序文「月一朞」三字涉無義。「月」字疑爲「且」字誤刻。

纂修存疑

方中山：

據王褒「桃林燕集序」，方氏以校官預役。中山蓋別字，疑爲閩人。說見王孟條下。

林賜：

「乾隆福州府志·列傳」：林賜字伯予，長樂人。洪武癸酉鄉試第一。永樂間教諭樂平。學該博，持守端嚴，巖然一時之望。」（卷五三頁七下）

據王褒「桃林燕集序」，賜以校官預役。說見王孟條下。

李庠：

王褒「梯雲樓記」：「……三衢（季）李庠弘，兄廣弘濟，宋左丞相兼樞密使宗勉裔孫也。世居石屏源上。其先君子彥

華氏構書樓屋之偏，命二子藏修樓中，題其楣曰梯雲，蓋期待其科第進身以繩祖武也。用是庠領鄉薦，入成均，預秘閣纂修之列。念先君子棄館舍而母夫人垂白北堂，私心弗寧，懼無以奮樓之實，謁予記以廣之……。」（「養靜文集」卷一頁八二上）

按：褒序李庠「季」字蓋「李」字之誤刻。蓋宋左相而嘗任樞密使者，但有李宗勉，無季宗勉。宗勉富陽人，卒贈少師，諡文清。「康熙富陽縣志·人物」有傳（卷九頁四三上）。餘可參考昌彼得等「宋人傳記資料索引」頁八九六。若李庠則同志無考。三衢或指常山，或指開化，然「康熙衢州府志」「乾隆開化縣志」「光緒常山縣志」亦於李庠無考。又王褒集中序記諸文所稱預秘閣纂修，預東觀校讎之類諸人，俱係曾預「大典」之役者，故疑李庠亦其一也。

姜子萬：

據王褒「桃林燕集序」，姜氏以校官預役。子萬蓋別字，疑爲閩人。說見王孟條下。

俞禮：

禮浙江海寧人。永樂二年進士，選庶吉士。可能預役，說見曹景暉條下。

徐聆：

王褒「雲岫書堂記」：「信爲江閩浙三藩之界，……郡城之西，其地曰山門者，徐氏世居焉。其裔孫聆登永樂二年進士第，以庶吉士入翰林，預東觀校讎之列。以予平昔往來之雅，走謁予曰：聆之先世構堂雲岫山下，以爲圖書之室，宗族子姓，講習其中，其來遠矣。自曾大父則元、大父資深、父用中，皆以詞學知名當世。叔祖仲容，伯父用初，伯兄子年，相繼以經術登科甲。聆之有今日，皆父祖餘澤也……。」（「養靜文集」卷一頁一一上）

「同治廣信府志·選舉」：「（永樂甲申曾榮榜進士）徐聆（上饒人）——藁城知縣。」（卷七之一頁五一上）

按：朱保炯「明清進士題名碑錄索引」作徐與聆，江西上饒人，永樂二年三甲第八十九名進士。又王褒文集永樂初所撰諸序記，言入秘閣或東觀預校讎者，即曾預「大典」之事者。參觀王孟，陳福山，李庠諸條。

高標：

「福建文苑傳·明一」：「高標字彥恢，仕名廷禮，自號漫士。長樂人。……博學能詩，又善書畫。……嘗總唐人詩，揚挖其品，……凡九十卷，號曰『唐詩品彙』。……文皇帝時，標以布衣召入翰林爲待詔。遷典籍，卒。所著有『嘯臺集』、『木天清氣集』。」（卷六頁二上）

據王褒「桃林燕集序」，標以待詔預役。說見王孟條下。

曹彥昌：

據王褒「送曹通判之官姑蘇序」，彥昌浙江海寧人，永樂二年進士，選庶吉士。可能預役，說見曹景暉條下。

陳彥清：

據王褒「桃林燕集序」，陳氏以衛千戶預役。彥清蓋別字，疑爲閩人。說見王孟條下。

鄭定：

「民國閩侯縣志·文苑」：「鄭定字孟宣，（閩縣人）。善擊劍，工古篆隸書。陳友定辟爲記室。友定敗，亡交廣間。

已，入長樂，居之。洪武中舉明經，爲延平訓導，末年徵爲齊府紀善。永樂中遷國子助教，有『澹齋集』。時閩中善詩者稱十才子，福清林鴻爲之冠，以外鄭定、王褒……。」（卷七一頁四上）

據王褒「桃林燕集序」，定時以王府紀善預役。說見王孟條下。

附 錄

纂修呂昇：

王文（頁一八六）引「正史韻姓」謂「景泰四年十二月南京大理寺少卿呂昇卒」。又引楊榮「送福建按察僉事呂公考滿復任詩序」云：「會稽呂公升常」。按魏驥「故中憲大夫南京大理寺左少卿呂公神道碑」（「南齋先生魏文靖公摘稿」卷七頁一上）云：「（公）別號振鐸。年九十，以景泰五年十二月十五日沒於正寢。明年十二月十九日葬于此。」據此可正呂氏

卒年，並知其生年及別號。

纂修何澄：

郭文（頁四二）王文（頁一八五）俱引「乾隆建昌府志」，謂何氏「教諭福寧，……陞海康丞。……母喪，服除赴闕，修『永樂大典』。居七年、乞假還母墓」。按何文淵「廬江何氏義莊記」（「東園遺稿」卷三頁三二上）所記較詳，節其要者如次：「近時吾宗新城舸齋先生立義莊於其所居之鄉曰廬江，蓋以均贍族人也。……庄中修葺之費給之，其餘大槩倣（范）文正公之遺矩也。……（先生）與修『永樂大典』。仁宗皇帝嗣位之初，……吏部尚書蹇公以先生薦。擢禮科給事中，直弘文閣，禮遇隆甚。……先生年垂七十，請致仕，宣宗皇帝賜歸于鄉。其在仕途四十餘年。」又記文稱宣宗，是何澄正統間尙存也。

纂修李曄：

王文（頁一八七）引「光緒杭州府志」，謂李氏「洪武二十二年除中書舍人。升度東按察司僉事。永樂間預修『大典』。除江西參議。卒」。按王褒「送李參議歸閩藩序」（「養靜文集」卷四頁一上）則云：「閩藩參議李公子華首應茲（『大典』）選。公昔以博通之才，弘偉之器，入拜中書舍人。……爲國之華且十年。出持廣左憲節。……再直史館，恭承先帝『實錄』之召。……繼參閩藩，咨諏岳政。……茲焉校讐之選，蓋以登陟之素也。書成，錫賚而歸於閩。」王氏閩人，說李氏參議閩藩，當可據信。設若李氏官終江西參議，其與修「大典」前後，亦俱爲福建參議已。

纂修陳敬宗：

王文（頁一九七）引「明史」、「南雍志」、「天啓慈谿縣志」俱云陳氏字光世，而不載其卒年。按魏驥「朝請大夫贊治尹國子監祭酒致仕陳公墓誌銘」（「南齋先生魏文靖公摘稿」卷七頁一九下）則云：「天順三年五月二十日……四明陳公年八十又三卒于正寢。……（其子）徵予銘其墓。噫，予與公老友也，可忘情哉。……乃按狀序而銘之。……公名敬宗，字光祖，別號澹菴。」此以敬宗字光祖，於義爲長。準此文，又可知其別號與生卒也。

纂修梁宗仁：

郭文（頁五四）王文（頁一九五）俱引王洪「鶴溪書舍記」云：「毘陵爲京輔望郡，而山水佳者曰鶴溪。鶴溪之民族盛而良者曰梁氏，其子弟敏而好問學者曰宗仁」。按王褒「鶴溪書舍後記」（「養靜文集」卷一頁三〇下）則云：「毗陵之勝，獨稱鶴溪。……溧陽梁濟宗仁氏買田築室于溪之上。……永樂四年夏宗仁氏用大臣薦，入校書東觀，數謁予文記之」。據此梁氏以宗仁爲字而濟實其名也，其人蓋由溧陽而遷毗陵者。

副監修梁潛：

郭文（頁一九）王文（頁一七四）引楊士奇「贊善梁公潛墓碣銘」及「萬曆泰和志」，俱但謂梁潛字用之。按蕭鏊「坦菴先生文集序」（「尚約居士集」卷四頁二上）云：「永樂中泰和有兩梁先生，皆以文章名當世。伯氏蓋泊菴先生，仲氏則坦菴先生也。……先生諱混，字本之，坦菴其別號也。泊菴先生諱潛，字用之。」據是知梁潛號泊菴，兄弟並以文名。

纂修虞原璩：

王文（頁二一一）引「正史韻姓」云原璩「字叔園。……（『大典』）事竣，特授東宮清秩，以母老，堅求歸養。」按何文淵「祭瑞安虞先生文」（「東園遺稿」卷三頁三九下）云：「正統六年，歲在辛酉，正月某朔越十日，……何文淵具酒殺遣宗侄（潢）……致祭于瑞安環菴先生之靈。……永樂初，朝廷纂修墳典，先生與纂修之列。……書成，力辭還鄉，以德行惇化閭里。予自宣德庚戌來守溫郡，先生儒衣儒冠來見，從容告予以牧民之方，予皆次第行之。」準此知虞氏號環菴，「大典」事竣餘三十年始卒，其間爲鄉先生，不復出。

纂修趙志：

郭文（頁六四）王文（頁二〇一）俱引王直「送趙縣丞歸南城序」云：「南城丞趙志。……志時在星子縣幕，被薦入館閣，與編摩（『大典』）。按王褒「麗澤齋記」（「養靜文集」卷一頁二五下）則云：「歙之休寧趙志學甫以南康之星子幕官入東觀，預纂修『永樂大典』之列。與予同館者三年，相知爲深。復以近臣薦，擢撫之宜黃令，以麗澤齋屬予記。……志學甫揭扁名齋。……志學甫學優而仕，德懋而官。」據是知趙志爲休寧人，別字志學。

附 註：

【註一】：郭伯恭「永樂大典考」有一九三八年商務印書館「國學小叢書」本，一九六二年台灣商務印書館本，一九六七年台灣商務印書館「人文文庫」本，後二本皆影印前本。其書頁八一云：「總計前列百九十四人，餘『實錄』所載二十八人外，爲余所新考者百六十六人。」然見名者實得監修四人，正副總裁三十四人，纂修一百三十五人，謄錄圈點生二十人，凡百九十三而已。又其中副總裁李賁、楊觀、潘幾三人，並無考略。

【註二】：王重民「永樂大典」「纂修人考」載「文史」第四輯（一九六五·六）頁一七一——一二二。文頁一七一云：「略爲排比，得二百四十六人」。按梁潛前後任副總裁副監修，合爲一人，故所錄實得二百四十五人。又郭伯恭文所具李賁、楊觀、潘幾三名，此文已各繫歷略，而郭文所考王道立、周啓、陳碩望、張俊四人，則反不見。

【註三】：見上引王重民文頁一七一。

【註四】：本文所用王褒「養靜文集」係普林斯頓大學影日本內閣文庫藏明萬曆間刻本。原書八冊，冊面籤題「王養靜全集」，然詩文實各爲集，各爲五卷。文集卷端題「玄祖翰撰養靜公文集」，頁心刻「養靜文」三字。詩集倣此，唯易文字爲詩字。二集俱王氏六世孫應鍾編刻。詩集前冠萬曆十六年戊子秋應鍾所撰序，題作「刻翰撰養靜玄祖全集序」。據序，是時詩集刻已成，而文集正付剞劂。

【註五】：三書亦郭王二文所未引用者。「南齋先生魏文靖公摘稿」十卷，康熙八年修補弘治十一年洪鍾校刊本。「東園遺稿」四卷，嘉靖三十八年浦之浩序刊本。「尚約居士集」二十卷，弘治七年蕭昉刻本。此所用者，亦係普林斯頓大學影日本內閣文庫藏明清原本。